

coucher tous pesle mesle les uns parmy les autres fans separation.

Voyla donc le bon Pere logé, mais en tel lieu qu'on ne voyoit que paureté, le ciel estoit sa couverture & la terre nuë son liçt mollet : pour toute vassielle * il n'auoit que son escuelle d'escorce, & le reste estoit bien peu de chose, encore se sentoit il bien-heureux, ô mon Iesus d'auoir rencontré un si bon hoste.

Mais il arriua par mal-heur peu de iours après sa venuë une maladie inopinée au frere de ce Sauuage, pour laquelle il fallut faire alte au milieu des bois par l'espace de dix ou douze iours, pendant lesquels on chercha partout des remedes à ce mal qui ne pû estre si-tost guery, car les Medecins ny les Apoticaire n'y font pas là des plus scauans. Il fallut donc auoir recours à l'oracle & voicy comment. Le bon homme fist dresser au milieu de sa cabane une espece de tour ronde avec des paux picquez en terre redoublez en-dehors avec des couuertes & des escorces de bouleaux pour la rendre noire & || obscure, car le diable fuit partout la lumière.

Cela estant fait, il fit entrer dedens un maistre Pirotois ou Magicien, pour s'informer du diable qui auoit donné ce mal à son frere, afin de l'en punir & guarir le malade par le moyen de ceste punition, car ils sont tellement superstitieux en leurs maladies, qu'ils croient qu'elles leurs * sont ordinairement données par autruy, ou causées par le malin esprit, qui en effect leur en donne souuent d'imaginaires, qui se guerissent par de pareilles imaginations, & voyla ce qui met le diable en credit.